

Tge è propi tipic grischun?

La «Terra Grischuna» preschenta diversas fatschettas persuerter

■ (anr/gc) La novissima «Terra Grischuna» (5/2016) dat cun bels texts e maletgs reussids in'invista e survista simpatica da quai ch'ins po contemplar e considerar sco insatge ch'è tipic grischun – tar carstgauns e chaussas.

Quai va dentant bler pli lunsch che sur clischas ora sco: terra dals capricorns, il pli popular dialect svizzer, multifariadad linguistica, tradiziun da chant e musica, originals e maisters-professionists sin divers champs.

Characteristic per ils abitants

Cuss. gov. *Mario Cavigelli* caracterisescha Grischunas e Grischuns sco zais, perseverants e mintgatant era stinads. Els èn dentant – tenor il magistrat – attaschads ed averts vers esters e novaziuns. – In proverbi per far spass ord la Surselva di che gnanc Dieu sappia tge ch'in Grischun patratgia. Schebain quai ha da far cun las atgnadads culturalas en il chantun da las 150 valladas u plitost cun la serradadad proverbiala dals abitants en muntogna resta avert.

L'animal en la vopna grischuna

Il capricorn è in animal cun status da simbol. Cun Gian e Giachen fan dus capricorns dapi onns tras spots pli u main originals reclama turistica per il Grischun en la televisiun. Quai sa fetschia – tenor il nov directur da Grischun Vacanzas *Martin Vincenz* – bain ed originalmain. En il Grischun datti enturn 6000 capricorns. Dapi 500 onns sa chatta el era sin la vopna da l'investgieu da Cuira e dapi 200 onns sin quella dal chantun. Sia



cornà è tschertgada sco trofea da chatscha. Na surstar fai perquai era ch'ina contribuziun è deditgada a la chatscha ed als chatschadurs dal Grischun – sco insatge tut spezial.

Cuntrada da chant e musica

L'allusiun a chant e musica en il Grischun n'astga betg mancar. Menziunads vegnan t. a. chors renumads rumantschs: Il Cantus Firmus Surselva ed il Chor viril Surses. Deplorà vegn dentant ch'il dumber da chors da l'uniun chantunala è sa reducì da 1998 fin 2014 da 144 sin 131 e quel dals commembers per passa 1000 sin anc 4200.

Sco il pli enconuscent cumponist grischun vegn Gion Antoni Derungs al-

legà, ma era Tumasch Dolf, Duri Sialm, Armon e Robert Cantieni sco Otto Barblan s'audan latiers. *Gion Balzer Casanova* è vegnì distinguì 2009 per la pli bella chanzun rumantscha «La sera sper il lag». Leграivel è ch'i dat spezialmain en la Rumantschia ina retscha considerabla dad enconuscents chantadurs, chanta-duras, dirigents, cumponists e solistas giuvens.

Ils pli originals e rekonuschids

Interessanta è la glista dals 10 pli originals e renumads Grischuns. Tranter quels sa chattan er: Il plevon Johann Künzle (enconuscent er en terra rumantscha sco «Pfarrer Künzle») cun sia medischina naturala, *Renzo Blumenthal*, mister Svizra 2005 ed il cabarettist Zarli Carigiet. Sin rang in figurescha dentant Alois Carigiet che ha fatg ils maletgs per l'«Uorsin» – tenor il cudesch da Selina Chönz.

En il Grischun è vegnì construi autenticamain. Plirs architects sco *Peter Zumthor* e *Gion A. Caminada* èn rekonuschids e vegnids distinguìs. Tar quels s'audan er ils architects *Capaul Blumenthal*, Glion, sco er *Men Duri Arquint* e *Corina Menn*.

Sut il titel «Maluns, capuns e...» interpretescha *Andreas Caminada*, bain il pli enconuscent cuschinier grischun e svizzer, la cuschina da noss chantun. El haja cumponì aposta per questa «Terra Grischuna» da nov duas tipicas spezialitads grischunas. – Anc bleras e variadas contribuziuns èn cuntegnidas en questa bella ediziun da la «Terra Grischuna».